

## Tou latje löme *(Autor: Nis Albrecht Johannsen d. J.)*

Wat en häi, wat en häi!  
Üüs suurt schäip heet löme fungen;  
Jüst di däi, jüst di däi,  
As da jarste loosche süngen.  
Tou latje löme,  
linj suurt än iinj wit;  
Tou latje löme,  
linj aw ark sid.

As dåt wääder moi än nat,  
Spaale's, as ik wiitj ai wat.  
Dan baase's riin wil  
E feen ap än dil,  
Ouer åål da klunke,  
Ouer da möljwjarpsbunke;  
Uk trinam e kööl  
Gungt et wälj sü njööl.  
Ouers teelt dåt suurt mam:  
„Kam nü smuk, kam!“  
Sü gungt et önj e fliiene fård,  
Dåt arken duch di jarste wårt.

Dan foue's wat tu dränken;  
Huum hiirt's dan fåli slänken.  
Dåt suurt forålem, hü't ham dan wjart;  
Hü as et tupåås, hü gungt dan di stjart.  
Ik stönj deer dan bai än tånk: dåt as was!  
Dåt jeeft duch ninte, wat njütier as  
As tou latje löme,  
linj suurt än iinj wit;  
Tou latje löme –  
linj aw ark sid.

(In: Johannsen, Nis Albrecht. 1956. *Beerid*. Naibel: Andresen. S. 63.) [Auch in: *Stobe an kiming*, S. 15]